

愚

齋

存

稿

愚齋存彙卷第二十目錄

郵傳部奏疏下

酌擬廣西官電辦法摺

請派電政局局長片

請給郵政電政各總局關防摺

釐定全國鐵路軌制摺

輪船招商局二年份營業情形摺

郵政司添設差缺片

本部四政經費不敷應請追加預算摺

福建鐵路公司應令舉員接管並籌善後事宜摺

查辦四川鐵路公司虧倒鉅款摺

遵訂驗收鋼軌章程摺

議覆籌修歸包鐵路摺

統籌郵政經費請照撥六關認定款項摺

郵政購運華洋物料照案免稅片

直省驛站收管情形並經費難裁摺

定期接管驛站並擬辦法摺

請改鑄郵報處新印片

郵報處各衙門往來文件照章納資片

聲明湘路股款情形分別辦理摺

議覆西潼鐵路收歸官辦摺

議覆滇省減收鹽糧路股摺

京張鐵路兼辦雞鳴山煤礦情形摺

愚齋存稿卷第二十

郵傳部奏疏下

酌擬廣西官電辦法摺

宣統三年四月

奏爲酌擬廣西官電辦法請

旨遵行恭摺仰祈

聖鑒事宣統三年四月初二日准軍機處交片奉

旨沈秉堃電奏桂省邊瘠局勢艱危請准將道府廳州縣及各營隊發遞本省衙署暨兩廣總督官電仍一律免費並照部咨以邊防軍務拏匪交涉災賑及查辦事件六項爲限等語著照所請該部知道欽此欽遵到部

伏查臣部上年十二月奏請將各省官辦電報歸部辦理酌擬辦法一摺內開督撫以下因公發遞官報核定等次分別納費等語通咨各省遵照一律辦理旋准護理廣西巡撫魏景桐電稱廣西軍務學務警務賑務交涉查辦緊要事件均用電報向章紫花印官電發遞兩廣者列作一等免費發遞他省者列作一等收半費又省城司道發遞本省官電無論明密均一律按四等明碼收費發遞他省者亦按四等收費又省城府縣及省外各衙署營防因公發遞本省及兩廣總督官電不問何項事件均列一等免費現既改歸部辦桂省預算不

敷請仍照舊章辦理當經臣部以官電分等納費京外各署循行已久均列預算官綫省分未便兩歧現擬將紫花印電不論本省他省照一等半價省城司道仍照舊章府縣營隊發遞邊防軍務拏匪交涉災賑及查辦事件六項官報專遞本省衙署暨粵督署者暫照同府報價核收作正開銷列入追加嗣據廣西追加電費估計銀二十餘萬兩由度支部片行臣部核復臣部比較各省官電數目核定廣西官電報費按照七八萬兩之數准其追加片行度支部核准各在案今廣西巡撫請將道府廳州縣及各營隊發遞本省衙署暨兩廣總督

官電仍一律免費並照部咨以六項爲限等語查臣部此次接辦官電共計十有餘省報價關係全局未便於一隅之地遽行免費且向來官電省分狃於免費積習或冗長詞費或任意濫發而緊要官報反被積壓臣部擬定分等納費辦法原爲各省冗長濫發等弊略示補救廣西邊瘠情形與各省微有不同故臣等於前護撫電商後即將府廳以下六項電報暫按同府價目核收不徒視尋常電價少納一倍有餘卽較紫花印電亦復輕減似於鄭重報務之中仍寓輕而易舉之意現該省追加電費已經度支部核准果能斟酌字句分別緩急

按照追加之數尙可節省自不至有礙行政惟廣西近日伏莽滋多電報繁重自以軍務爲最此案旣經奉旨批准應否將該省府縣營隊發遞本省衙署及兩廣總督軍務電報准其暫行免費事平仍卽停止其餘仍暫照同府價目核收之處自應請

旨裁奪恭候

命下臣部咨行廣西巡撫遵照辦理所有酌擬廣西官電納費辦法謹恭摺具陳伏乞

皇上聖鑒訓示謹

奏 本月二十四日奉

旨

請派電政局局長片

宣統三年四月

再電報前歸商辦向在上海設立總局原爲便於策應起見現既歸部辦理情形不同而本年接收各省官電以來綫路愈廣事務亦倍形繁賾凡考驗工程調遣員司慎重收支接轉報務諸大端均屬行政樞紐責任甚重必有統一之規模乃期推行之盡利現鐵路已在臣部設立總局郵政收回在即亦當照辦電報事同一律自應將上海電政局移設到京由臣部就近督飭辦理庶幾事權歸一免致紛歧惟電政爲四政一大局管轄二十一省電局數百所必須派一局長方能承上啟下

收效將來此項人材實非專門難期勝任查有現充電政局總辦二品銜候選道周萬鵬係肄業美國學生出身隨臣宣懷創辦電報已三十年諳練電學資勞最深中國電報與英丹俄法日各國水陸接綫交涉極繁該道於此中窾要已能操縱自如擬請

恩准賞給四品卿銜派充電政總局局長以期得力而資臂助所有上海電政局應卽改稱上海電報分局該局事繁任重亦非熟悉洋務電務人員難期勝任查有該局提調候選知府唐元湛堪以總辦原有附屬之洋報核算處電報物料處以及電報學堂仍留上海派員

辦理悉歸電政總局管轄俾臻妥洽是否有當恭候
命下 臣部遵照辦理謹附片具陳伏乞

聖鑒訓示謹

奏 本月二十四日奉

旨

請給郵政電政各總局關防摺

宣統三年五月

奏爲

臣

部郵政電政各總局請

飭鑄給關防以資信守恭摺仰祈

聖鑒事竊本年四月二十四日

臣

部片奏請將上海電

政局移設到京並請將候選道周萬鵬賞給四品卿銜
充該局局長又於四月二十八日會同內閣具奏郵政
定期接收應派局長一員暫由署左侍郎

臣

李經方兼

理各等語欽奉

諭旨允准在案現在郵政總局刻期成立電政總局卽
須移京郵電爲交通要政統轄二十一行省分局事體

既繁責任尤重所有往來文牘關係緊要應請

飭下禮部鑄給關防文曰郵傳部電政總局之關防郵傳部郵政總局之關防各一顆恭候

命下臣部遵照辦理其未經鑄就以前應由臣部先刊

木質發給應用至將來釐定官制以後或須改關防爲印信之處屆時再行奏明辦理所有電政郵政各總局懇請

飭鑄關防緣由理合恭摺具陳伏乞

皇上聖鑒謹

奏 本月初六日奉

旨著照所請禮部知道欽此

釐定全國鐵路軌制摺

宣統三年五月

奏爲鐵路推行日廣擬請釐定全國軌制以昭畫一恭摺仰祈

聖鑒事竊維肇域之基功昭同軌置郵之法事起傳車以鐵路代驛道而興倘軌制不克整齊卽車制終多扞格政關統一實非細故當我國創路之初原係借款興築其制各依所借款國之工程師而定迄未著爲通章以是津榆則制取於英盧漢則制取於法沿至續建之正太汴洛萍洙道清滬甯京張及現建之廣九吉長張綏津浦粵漢川漢等路所有軌式軌量靡不互相參差

卽驗收鋼軌章程亦復淆襍紛歧莫衷一是若長此不予釐正將來各省路綫接通必有此路車輛不能駛於彼路軌轍者爲行軍起見徵調固慮不靈卽爲通商設謀運輸亦虞多阻與其日後改正必至巨款虛糜不如及早圖維猶足收無形之益查現在各路定造之軌有英式者有美式者有法式者其重量則有六十鎊至八十五鎊或二十八啟羅至四十一啟羅不等惟川漢預定軌式及京奉滬甯津浦南段同用英國軌式每碼同係八十五鎊所差無幾均經英國工程會審慎核定尤以川漢預定之式爲最適宜至製軌之鋼西國通行原

有貝色麻多麻馬丁三種論價則貝多賤而馬丁貴論
質則馬丁純而貝多脆近年各國新廠用品早舍貝多
兩種專用馬丁而我國尙有沿襲西人舊製指索貝色
麻鋼者誠大誤也現在漢陽鐵廠不惜工本已將煉鋼
爐悉改馬丁出數亦十倍於昔俾得供應各路所取求
以保本國利權而塞絕大漏卮以上各端經臣部飭令
漢陽鐵廠總辦李維格切實具復並據呈送各種圖樣
前來復經臣等督同部員及中外各工程司逐細研求
灼見情形如此茲值奉

詔明定鐵路政策之際擬請將幹枝各軌均按照川漢

所訂之英式爲定式而鋼質皆取馬丁不得紛歧攙雜
重量則幹軌定爲八十五鎊枝軌定爲七十五鎊其叉
軌及附屬如魚尾片狗頭釘螺絲門等件各視其軌式
軌量爲率凡從前各路軌制擬令於將來修理之際逐
漸改歸一律俟奉

俞旨卽由

臣

部頒發圖式分別咨札通行庶幾九道同

塵允就馳驅之範萬方合轍益宏坦蕩之規除車制歸
入路律廠務編及驗軌章程應俟規訂完全再行陸續
奏定外所有擬請釐定全國鐵路軌制以昭畫一緣由
謹恭摺具陳伏乞

皇上聖鑒訓示謹

奏 本月十八日奉

旨依議欽此

輪船招商局二年份營業情形摺

宣統三年六月

奏爲恭報輪船招商局宣統二年份營業盈虧情形繕摺具陳仰祈

聖鑒事竊查宣統元年十二月十三日

臣部奏陳輪船

招商局歷年官督商辦情形並酌擬查核帳目辦法摺內聲明該局出入款目由

臣部

詳加考核每屆年終將營業盈虧情形奏報一次並咨明度支部農工商部等

因嗣

臣部

於宣統二年六月初十日將輪船招商局宣統元年分第三十六屆收支款目恭摺奏陳奉

旨知道了欽此欽遵在案茲據輪船招商局申稱自宣

統二年正月起到十二月底止爲該局第三十七屆結
帳所有輪船棧房出入款項繕具清冊呈請查核等情
前來臣部查清冊內開本屆各輪船水腳共收規銀二
百十九萬五千三兩四錢七分四釐又收三公司公攤
水腳攤進規銀八萬五千七百六十八兩三錢二分除
支各船保險規銀二十二萬七千十五兩八錢各船關
費規銀七萬八千七百八十一兩四錢二分二釐各船
修理規銀十二萬一千八百六十一兩九錢一分五釐
各船用煤規銀七十一萬四千七百四兩八錢二分各
船辛工規銀六十四萬七百八十一兩四錢一分九釐

各船用物規銀十二萬六千七百四十兩四錢九分五釐各船各力規銀二十五萬六千二百九十七兩九錢八分九釐碼頭雜用減腳等項規銀十三萬八千二百七兩一分五釐外計虧規銀二萬三千六百十九兩八分一釐又各棧房產業等利共收規銀四十七萬二千七百八十七兩七錢四分五釐除支漕運結虧規銀二萬三千一百三兩五錢六分一釐各項修理規銀五萬九千三十一兩三錢四分六釐各項繳費規銀二十三萬三千七百一十五兩一錢五分四釐各地租捐規銀八萬一千八百六十五兩三錢八釐外計餘規銀七萬

五千六十二兩三錢七分六釐又除船繳項下結虧規銀二萬三千六百十九兩八分一釐淨餘毛利規銀五萬一千四百四十三兩二錢九分五釐除支本屆官利餘利規銀六十萬兩外淨計不敷規銀五十四萬八千五百五十六兩七錢五釐此項不敷之數在於上冊備添船棧存款項下開支規銀四十萬兩自保船險項下撥墊規銀十四萬八千五百五十六兩七錢五釐均經核明結總刊刻帳略宣告各股商隨即彙報到部臣等督飭司員詳加覆核散總數目均屬相符自應遵照舊案據實

奏陳惟是比年以來各國航業競爭劇烈通商各埠紛
紛倒帳以致該局生意有減無增所報厯屆虧短自係
實在情形應由臣部嚴飭該局以守爲戰力籌整頓仰
副

朝廷振興航政之至意除咨明度支部農工商部備案
外所有奏報輪船招商局宣統二年分營業盈虧情形
緣由謹循案恭摺具陳伏乞

皇上聖鑒謹

奏 本月十二日奉

旨知道了欽此

郵政司添設差缺片

宣統三年六月

再臣部各廳司差額係於光緒三十四年三月二十八日

奏定郵政一司因開辦時事務尙簡設司長一員副司長暫缺酌分兩科將來部務增繁如有必須添置差缺之處再行奏明辦理當日奉

旨依議欽此欽遵在案近因郵政業經奉

旨接辦所有上年九月奏定分年籌辦郵政清單內推廣郵路局所擴充匯兌儲金暨編定郵律興辦郵船等事均爲交通要政已陸續加派司員幫同經理現又接

管驛站擬歸該司辦理頭緒益形紛繁前定差額不敷
辦事臣等公同商酌應卽補設副司長一員增設二科
所有科長暨二三等科員各一員按照臣部各司等差
一律辦理謹附片具陳伏乞

聖鑒訓示謹

奏 本月十二日奉

旨依議欽此

本部四政經費不敷應請追加預算摺

宣統三年六月

奏爲

臣

部四政經費不敷應行追認遵

旨先行敘明理由恭摺仰祈

聖鑒事查上年十二月資政院試辦宣統三年總預算案經院議決會同內閣會議政務處具奏奉

上諭如確係浮濫之款卽應極力減削若實有窒礙難行之處准由京外各衙門將實用不敷各款繕具詳細表冊敘明確當理由逕行具奏候旨辦理欽此旋於本年正月十五二十四等日迭奉

諭旨遇有特別重要事件籌有的款方准再議追加各

等因欽此欽遵由度支部先後咨鈔到部查資政院原奏清單內開郵傳部所管輪路郵電概係營業性質自應適用特別會計此次核減之數除該署行政經費應照預算案開支外其餘營業局所之收支應由該部速訂所管各政特別會計法據以編製特別會計簿冊如於本年預算修正數目實有支用不敷之處即可適用此項法律仍於決算年度將詳細簿冊咨送本院追認等語又查本年正月閒度支部奏定預算章程業將船路電郵四政經費定在特別預算暫行簡章之內是臣部四政應歸特別會計早爲度支部資政院所公認惟

上年臣部試辦本年預算案在特別預算簡章未定以前彼時並無成例可循故暫將出入款目概照普通預算辦理然營業與行政性質迥殊其質本之縮伸收支之盈虧皆隨時自爲消息是以各國辦法亦與普通預算不同且臣部諸事須待振興凡畫一軌制接收郵政規畫船務以及路電等局修築設備各要端俱非鉅款不辦臣等再三籌度與其囿於普通預算但爲削足適履之謀不若援照特別章程尙合開源裕國之意其臣部行政經費經極力削減業已毫無浮濫茲特遵查度支部資政院奏定各章謹將四政經費應行追認各理

由先行具奏敘明以昭慎重除詳細表冊應俟決算年度再行分別奏咨外所有遵

旨敘明四政經費不敷應行追認情形理合先行恭摺具陳伏乞

皇上聖鑒訓示謹

奏 本月十二日奉

旨

福建鐵路公司應令舉員接管並籌善後事宜摺

宣統三年

閏六月

奏爲福建鐵路公司應行舉員接管並籌善後事宜恭摺仰祈

聖鑒事竊查福建鐵路前於光緒三十一年七月經該省同鄉京官光祿寺卿張亨嘉等公舉前內閣學士今候補侍郎陳寶琛承充總理呈請商部奏准立案嗣經該侍郎親赴南洋各島招集華僑股本百七十餘萬元復咨請閩浙總督援照各省已辦成案籌辦糧鹽兩捐以爲保息一面按照商律招集股東組織公司公舉總

協理董事查帳各員該侍郎仍被舉爲公司總理因就漳廈一綫先將首段開工歷經咨呈臣部有案宣統元年二月臣部派員蒞廈勘查據委員覆稱已開各工路線平直工程堅固一切佈置亦尙得宜惟款項業將不繼其時適該侍郎奉

召來京仍爲駐京總理商由臣部交通粵行息借銀洋五十萬元約明以保息之糧鹽兩捐作抵現准該侍郎咨稱首段五十六里雖已完工開車營業而路線過短客貨所入不足以供行車養路之用至交通銀行借款除已還十萬元外尙短四十萬元原擬備抵之糧鹽兩

捐欠解約四十餘萬元益以本屆收入以之抵還債款
並補助行車尙爲有贏無絀寶琛現奉

恩命入直

內廷礙難兼任他差自應呈部奏明開去閩路總理差
使先行舉員由部電派暫行接管仍准該公司召集股
東另舉總理承充但公司善後事宜自應預爲清理擬
請由部奏明飭下閩浙總督將欠款四十萬元由閩路
糧捐清算明白按月撥解交通粵行以清債務其鹽捐
一款專充補助公司營業之費仍按月認解若干分別
責成福建財政局鹽法道如期撥付等情請爲分別奏

咨前來臣部查陳寶琛總理閩路頗著成績現因入直內廷礙難兼顧所請開去總理差使委係實在情形應由臣部咨請閩浙總督轉飭該公司召集股東會另舉總理接充至現辦漳廈一線集股百七十萬元開車達五十六里尙以股款不敷而糧鹽兩捐又解不如額致須借款接濟今該侍郎咨稱就閩路應得之款應公司各項之需先求可以維持庶還款有著不至重累公家卽接辦有人亦可稍紓商力且係奏准有案斷難任其延欠擬請

旨飭下閩浙總督責成福建財政局鹽法道會同該公

司承辦人員將歷年欠解之糧鹽兩捐迅速清理照案按期移撥以重部款而維路政所有該侍郎應行開去閩路總理差使並舉員接管兼籌善後事宜緣由理合恭摺具陳伏乞

皇上聖鑒訓示謹

奏 本月初六日奉

旨

查辦四川鐵路公司虧倒鉅款摺

宣統三年閏六月

奏爲四川鐵路公司虧倒鉅款遵

旨查核辦理恭摺仰祈

聖鑒事宣統二年九月初七日奉

諭旨內閣侍讀學士甘大璋等奏川漢路款虧倒過鉅
請亟按律查追並籌改良辦法一摺著郵傳部知道欽
此又十月十七日奉

諭旨都察院代奏四川京官鄧鎔等爲川路股款虧倒
過鉅請撤銷總理仍督同經手追收欠款呈一件著郵
傳部查核具奏欽此又十二月初三日奉

諭旨前據資政院奏議決四川鐵路公司虧倒鉅款一案請旨裁奪一摺著郵傳部查照前案妥籌辦理欽此由軍機處片交到部並據川路駐京公司及四川京官杜德輿鄧鎔等以請追欠款及撤銷總理等情先後呈請前來當以此案關係重要頭緒紛繁經兩次派員在上海漢口宜昌等處嚴密訪查並迭次咨行四川總督分晰查復展轉考核確得其詳謹爲我

皇上陳之查該路虧倒滙款約分三項一爲正元等錢莊之款計正元倒銀五十一萬四千餘兩兆康倒銀三十九萬七千餘兩謙餘倒銀二十八萬五千餘兩元源

倒銀一萬六千兩有奇晉益升倒銀四萬三千餘兩寶
康倒銀三萬兩慶餘倒銀三萬兩德大倒銀八萬兩據
臣部委員所查數目均與江督等覆奏相同此外尙查
出有厚大倒款一萬八千兩裕源長倒款六千餘兩統
計錢莊倒款共約銀一百四十萬兩以上各錢莊本非
上等商號施典章分存多者一處至數十萬兩已屬不
合然猶可諉爲疏忽乃臣部調查施典章除私以公司
名義向正元借銀十萬兩又自借兆康銀十萬兩外並
查有十七萬兩一款私自移存匯豐銀行且德大號於
宣統元年八月倒閉而施典章於二年三月尙向該號

存款厚大號於二年三月倒閉而施典章於四月仍轉期交存參以江蘇督撫臣所查以正元遠期票掉換謙餘空票以圖朦飾一節尤爲詐僞顯然無從遁飾一爲利華銀行之款計銀六十萬兩此款本係施典章與陳逸卿私相授受暗訂合同不但川路總公司不與聞卽利華洋商亦未簽字現陳逸卿夥開各莊旣已虧歇誠如江督等所奏亦與被倒無異施典章以公司鉅款私自貸與洋行買辦查其合同旣云年息五釐又云如有溢利年終加付情節已極支離而臣部委員在慶餘號查得帳簿一冊此六十萬兩來往數目具列其中但註

明係陳逸卿與川路來往款並無利華名目而此冊中
又有由施子記卽施典章經手放與高益謙二十萬兩
一款施典章旣以六十萬兩放與利華何以陳逸卿又
在六十萬兩中撥付其二十萬兩殊堪詫異且據施典
章稱高益謙係股分公司而詢查滬市皆不知有此牌
號又其朦混侵蝕之顯然者也一爲各項股票之款查
施典章購蘭格志火油股票四百八十五股事前並未
報明總公司其移交帳單列作抵押公司銀五十五萬
兩復將股票在外押借銀兩現需公司備價二十九萬
餘兩方能贖回且此項股票係華歷五月初買入其時

滬市時價至多不逾一千五百兩而施典章報稱一千七百五十兩核其浮報之數從最少計已中飽十二萬餘兩之多此節江督等覆奏業已聲明據臣部所查施典章在路款撥付此項票價時內有二十萬兩卽行收入己帳有正元兆康帳簿可據且施典章月存草底凡付蘭格志之價款莫不將原文塗改參考前後各情直係將自有低價股票推與公司朦竊鉅資此其居心貪詐行同棍騙尤爲可惡據該公司辦事員單開存滬路款共三百五十萬此次虧蝕各款竟至一百九十餘萬而蘭格志股票一項尙不在內實屬敗壞公司人情怨

憤臣等詳加斷擬施典章濫放公司鉅款及自向錢莊
挪借銀二十萬兩皆屬不合至移存匯豐銀行之十七
萬兩暨放與德大厚大兩款跡近吞蝕而洋行帳目難
以詳查德大厚大款歸何處均應分別訊追尙難據以
定罪惟虛報蘭格志票價一項已侵蝕公司存款至十
二萬餘兩之多確有可憑查商律一百二十九條內載
董事總辦或總司理人司事人等如有偷竊虧空公司
款項或冒騙他人財物者除追繳及充公外依其事之
輕重監禁少至一月多至三年並罰以少至一千圓多
至一萬圓之數等語施典章除虧挪各款應責令擔任

歸還暨正元兆康之二十萬兩歸其自理業由江督等
奏准辦理外其虛報股票價值侵蝕公司銀十二萬餘
兩合依資政院議決辦法照商律一併追繳充公仍俟
全案完結發交該管地方官監禁三年罰金卽定爲一
萬元繳清後方得釋放如蒙

俞允應由

臣

部分咨江蘇督撫

臣

轉飭江海關道仍提

施典章到案先行管押勒限嚴追至該公司駐京總理
喬樹枏於上年七月因倒款一事曾呈請 臣 部及蘇撫
轉飭嚴追又查施典章與該路總理來往信函均有上
海存放款項由其一入主持向未稟承各總理等語似

喬樹枏尙不至扶同串弊至朦舉私派各員濫用股款
各節經咨據四川總督查復前年京官舉學部郎中曾
培充駐宜總理時總會尙未成立係由總公司在省開
各界股東會通過方請奏派去歲擬派施紀雲接管滬
款係董事局暨駐宜總理等均表同情有往來函電可
查似不得謂爲朦舉私派至京局用費上年除代宜昌
局支撥工程各項二萬七千餘兩又股息川資電郵等
九千餘兩外專屬京局員司薪水僅支四千餘兩統共
尙不至四萬兩並無生日宴客費用在內如鄧鎔等所
言者等語是以上兩節已經川督查明尙無弊竇可指

惟喬樹枏總司全局於滙款虧倒事前毫無覺察一任施典章所爲以致糜爛至此實屬無可辭咎應請撤銷四川川漢鐵路駐京總理至該公司工程款項應責成上海宜昌成都三處辦事人員暫行會同經管現當幹路收歸國有之時容臣等通盤籌畫另將該路事宜奏明辦理所有遵

旨查核辦理緣由是否有當伏乞

皇上聖鑒訓示謹

奏 本月 日奉

旨

遵訂驗收鋼軌章程摺

宣統三年閏六月

奏爲遵訂鐵路鋼軌驗收章程並繪呈軌制圖式恭摺
仰祈

聖鑒事竊本年五月十八日臣部具奏擬請釐定全國
軌制一摺原奏內稱幹軌定爲八十五磅附屬各件視
其軌式軌量爲率驗軌章程應俟規訂完全再行奏定
等語奉

旨依議欽此欽遵當經札飭漢陽鐵廠總辦李維格詳
細核議茲據將八十五磅鋼軌及附屬品製造驗收通
行規則酌擬稟復前來臣等伏查軌制爲全國路政所

關其製造之法至爲精微非微之圖說列爲章程不足以垂爲定式現所擬各辦法大要以英國通行章程爲本當未製造以前先由承造人照所頒發圖樣製備樣板交由鐵路總工程司或驗收員核定存查爲比對之券及既製造以後則由總工程司或驗收員逐一試驗如法選擇或抽取化分以察其所含質料之純駁鋼軌則較視其全體之是否平直重量長度之是否適宜及其懸重受擊之若何變態夾板鉤釘則視其鑽孔之是否脗合或鋼質之拉力及灣折力之是否堅韌其不如格者剔退更造以期益精以上各節經部飭由專門人

員悉心覆核均尙細密在製造家旣足爲楷模之助在驗收者尤足爲依據之資自應奏奉

允准由部頒行俾資遵守現川漢粵漢鐵路剋日開工急須訂造軌件擬卽飭令迅速照章辦理其餘各路應俟奏奉

俞旨卽行分別咨札通行以歸一律所有遵訂鐵路鋼軌驗收章程並繪呈軌制圖式緣由理合繕具清單恭摺具陳伏乞

皇上聖鑒訓示再此摺係郵傳部主稿會同內閣辦理合併聲明謹

奏 本月十七日奉

旨

議覆籌修歸包鐵路摺

宣統三年閏六月

度支部會

奏爲遵

旨議覆恭摺會陳仰祈

聖鑒事宣統三年六月二十二日准內閣片交陝甘總督長庚奏請籌修歸化城至包頭鎮鐵路一摺欽奉

硃批該部議奏欽此欽遵到部原奏內稱山西包頭鎮濱臨黃河水陸綰轂東通歸化城西通新疆古城西南通甘肅甯夏等處向來行旅皆由包頭以赴歸化今欲使甘肅土產各物暢銷他省必須有輕快之火車鐵路與河埠相接始能利商運而廣招徠迭經派員查勘由

歸化經薩拉齊廳至包頭鎮其計三百二十里路皆平坦無高山大澤之阻礙附近亦多煤礦木植若能籌款修築趕速勘定路線購地庀材與張綏工程東西並舉期以數年之間聯成一氣即可直達京津不惟甘省之商務可望振興卽纏金一帶開墾事宜亦當大有起色將來展築蒙古及新疆之路皆可以此爲始基是一舉而數利兼備擬請

飭下度支部郵傳部會同核議可否由大清交通銀行湊借銀四百萬兩以充經費分爲十五年本利還清如兩銀行難於通挪則請酌借外債亦可暫資周轉等語

郵傳部查該督前次奏辦歸新鐵路當經臣部會同度

支部議以路綫太長籌款不易奏覆在案此次該督請

先辦歸化至包頭鎮爲蒙古新疆路綫基礎誠以包頭

鎮濱臨黃河爲晉省西北交通孔道新疆甘肅各處商

貨大都出於其塗且與臣部現辦張綏路綫聯接自係

爲連絡交通振興商務起見應卽迅速籌辦惟運築鐵

路邊境較腹地爲難而購辦材料尤非按段遞運不可

故欲收交通之益必須由內及外由近及遠殊難同時

並舉查宣統元年七月臣部奏據工程司所勘張綏一

綫以邊地早寒每歲施工祇六箇月約計八年方能完

竣所擬綫路六百八十九里估需銀一千六百餘萬兩
去年因款絀暫停本年自天鎮向前接築計明年秋季
方能修至大同由大同至歸化尙有三百八十九里大
致雖已勘估迄今尙未詳細測繪歸化以上原議展至
河口聞河口不及包頭爲黃河運道利便糧貨聚會自
應改由歸化至包頭鎮該督原奏計工三百二十里卽
當一併勘估若照原議俟歸化路工八年告竣再行接
展而西似太迂滯籌大局固宜從速卽以營業論亦非
造至包頭必不能敷修養之費現擬遴派工程司自大
同達歸化以至包頭鎮逐細測勘估價凡遠購重料黃

河斷難分運天時寒凍土工亦難兼施擬將前途山洞
橋座艱難工作無待轉輸重料可以人力趕造者一面
分段辦理總期縮短年限早觀厥成至於需款多少一
經估定似不必因此耽誤查張綏工款係指撥京奉餘
利而餘利多所分撥不能專供一路之用故始事程功
略以八年爲限而由歸化至包頭三百餘里之工尙不
在內若專指餘利恐十年難成至借款一節臣部交通
銀行本係營業性質往來借貸多屬短期比年臣部應
辦要政甚多周轉尙不敷用殊難爲其挹注且該路未
經勘估究竟四百萬兩足敷與否更無把握似應俟勘

估之後另行會同核奏度支部查歸化至包頭一路西
通甘新聯貫水陸之樞紐自應及早籌辦惟該路需款
若干必待郵傳部勘估以後方有確數原奏擬向大清
銀行湊借一節該銀行亦係營業性質若令擔任十五
年長期借款似未合宜應統俟路綫工款勘估定後再
會同郵傳部妥籌詳酌奏明辦理所有遵議緣由謹恭
摺會陳伏乞

皇上聖鑒訓示再此摺係郵傳部主稿會同度支部辦
理合併聲明謹

奏 本月十七日奉

言

統籌郵政經費請照撥六關認定款項摺

宣統三年閏六月

奏爲統籌郵政經費懇將六關認定款項照數撥給恭摺具陳仰祈

聖鑒事竊

臣

部責任交通郵政欲事擴張經費乃形短

絀亟應統籌併計以爲先事之圖據實陳明以立進行

之則

臣

部自五月初一日接辦郵政督率員司黽勉從

事郵政總局業已遷移部內由

臣

經方兼署局長督飭

洋員總辦帛黎悉心經理數月以來京外各郵局酌量

事之繁簡準定局之等差已與

臣

部舊設之電政路政

各局規畫一律布置漸臻周密惟吾國幅員遼廓郵政

事業又必期於普及當郵政由海關代辦時直省繁盛之區固已星羅棋布至邊遠荒竄處所尙多缺略如新疆祇有迪化等局西藏祇有喇薩等局蒙古祇有庫倫恰克圖等局際茲邊地外交方亟若不急圖補救將何以謀抵制而利交通故新疆雲貴川藏各督撫大臣皆以郵政收歸部辦亟事擴充或以電商郵政辦法或以提塘議改文報以立郵政基業或以臺站裁兵騰餉議改郵夫立言均有確當之理由實按尙無指定之的款查郵政一項關係全國交通向無地方經費祇有光緒三十年四月外務部與戶部核定津海等六關每年協

濟銀七十二萬兩又以歷年解不足數海關墊款積至一百五十八萬餘兩目下虧款必欲分償而入項別無增益臣等討論辦法實與海關代辦微有不同一從前房屋占用各關業已劃分自應擇城市適中區域酌量分租一從前設局及代辦郵政合計四千七百有餘處隱含營業性質現歸部辦無論地方衝僻無論政務繁簡均須交通完密無有缺遺明知該地設局必致賠累爲交通計卽不能爲贏虧計也有此數端則所用經費爲數尤鉅現稅務處文移臣部允照前解三十二三萬兩之數按年撥給臣等籌思至再如不擴充或可勉強

數衍倘欲於邊遠地方酌量設局即使六關認定之七十二萬依期解足統計所虧尙多祇可視經費之多寡爲進行之標準果如各督撫大臣電商各節欲令多設分局而六關解不足額則所有購票寄件等入款萬不能敷長年郵政之支用可否懇請

諭令度支部稅務處飭下六關監督將前認關平七十二萬兩照數解足以期無誤全國交通要政此外不敷各項再由臣部竭力籌措勉爲其難至海關以前墊用各款當於三五年內設法分期歸還不得於協濟款內劃撥以清界限臣等爲統籌郵政起見是否有當伏乞

皇上聖鑒訓示謹

奏 本月十七日奉

旨

郵政購運華洋物料照案免稅片

宣統三年閏六月

再查郵政購運華洋物料從前隸屬海關時與海關物件合運均係免稅歷經辦理在案現在郵政遵

旨改歸

臣

部接管擴充辦法需款甚鉅正宜設法維持

臣等查郵政應用物料卽如郵票之類多係購自外洋而本國所產足資應用者亦屬不少以後所有本國已經製造或可以製造之品尙宜陸續斟酌採用暨暫時仍須取資外洋者購運之時均應援照免稅旣與從前辦法相同亦省郵政支銷之費相應請

旨敕下稅務大臣以後購運郵政華洋物料持有

臣部

愚齋存彙

卷二十

垂裕考

三

見利權

執照仍照隸屬海關成案一併免稅以免更張而資利便謹附片具陳伏乞

聖鑒訓示謹

奏 本月十七日奉

旨依議欽此

直省驛站收管情形並經費難裁摺

宣統三年閏六月

奏爲直省驛站業經收管謹將籌畫情形暨應用經費一時尙難裁汰恭摺仰祈

聖鑒事竊維臣部管理郵政總以次第擴張漸臻完備爲宗旨所有驛傳事宜業於上月二十九日奏歸臣部接管當日奉

旨知道了欽此欽遵在案查驛站經費向由直省分期咨報陸軍部奏銷今各項事宜旣歸臣部照舊辦理則向來應支一切經費自應劃歸臣部以爲統籌郵驛辦法近年各省窘於經濟往往各自爲政將原有驛站錢

糧或改作郵寄等費或隨時裁減提作別用似此辦法
紛歧既與臣部前次奏內漸減驛站增加郵局之議不
符而於將來設施尤多窒礙臣等公同商酌現當時事
艱難財力窘絀非統一政策酌劑盈虛無以籌目前之
進行卽無以備將來之挹注查各直省驛費原定額設
銀三百餘萬兩嗣經歷次裁減現計歲收銀不足二百
萬兩開支銀共一百七十六萬餘兩目下輪航鐵路交
通如果完密自不難概行裁汰以節用費無如西北等
處並各省偏僻地方輪軌既未通行郵政亦未普設卽
東南輪路已達各處所有馳驛等要差尙未妥定辦法

一時均難盡裁嗣後擬已通鐵軌及已設郵局處所舊有驛站由臣等隨時體察情形分別奏明裁改其交通未便之區凡夫驛臺軍邊各站仍須按照例章妥慎經理以期無誤交通俾驛遞郵傳輔車相依藉可銜結一氣將來航路兩項通至何處卽驛站文報裁至何處而經費視此亦可停至何處時時咨商各督撫事事咨報度支部庶內外風氣不致紛更而事實亦極融貫惟驛站有未克議裁之各省卽經費有不能議減之實情所以新疆巡撫以資政院上年議裁驛站經費不能不會同陝甘督臣奏請追加揆其情形固不獨一省爲然應

請旨飭下各督撫將歲支驛站文報局一切錢糧經費統報臣部酌核動支如有應行改併之處臣部亦當隨時知照各督撫實行裁撤庶此增彼減無畸輕畸重之衡而酌盈劑虛有漸推漸廣之效現在直省驛站錢糧各項經費既不得移作他用亦不能輕議改章臣部咨商度支部業經覆准按照陸軍部成案辦理如蒙俞允由臣部通咨各督撫欽遵核辦所有籌議驛站情形暨經費尙難裁減緣由謹恭摺具陳伏乞

皇上聖鑒訓示謹

奏 本月十七日奉

旨

定期接管驛站並擬辦法摺

宣統三年閏六月

奏爲定期接收驛站事宜並擬隨時變通辦理恭摺仰
祈

聖鑒事竊查上年十二月二十日陸軍部奏將驛站事
宜改歸郵傳部管理一摺奉

旨依議欽此欽遵抄奏咨行到部臣等當以驛站根於

郵政應俟郵政接管後方克定期接收等因咨復陸軍

部去後今臣部已將郵政收歸部辦驛站事宜擬卽定

於七月初一日接歸臣部管理以符統一交通行政之

旨伏維驛站之設原以軍報爲重軍塘臺站一切差派

遞送各項多與軍事相關故向隸兵部陸軍部掌管今
既改歸臣部自當與郵政合籌通計交通利便之區亟
應咨商各督撫如何改革如何銜接卽邊遠荒寫各處
尤宜注重添補郵局力謀擴充漸圖裁併惟是甫經接
辦頭緒紛繁似非詳慎酌核恐不足以資完善茲擬自
接收後暫行仍照舊章辦理其有應行改革之處隨時
計畫量爲變通以收循序漸進統一事權之效所有臣
部接收驛站事宜並擬隨時變通辦理各緣由理合恭
摺具陳伏乞

皇上聖鑒訓示謹

請改鑄郵報處新印片

宣統三年閏六月

再查陸軍部職掌內有原設之捷報處一所專司承領
內廷交發事件接遞各省呈送文摺責任甚爲重要現
既劃歸_臣部管理擬卽改名曰郵報處所有該處應辦
事宜由_臣部遴派委員在於原設公所地方妥慎接管
擬請

飭下內閣印鑄局另鑄新印一顆文曰郵傳部郵報處
之印頒發鈐用以資信守一俟領到新印再將捷報處
舊印照例繳銷所有接管陸軍部捷報處改名郵報處
並請改鑄新印緣由理合附片具陳伏乞

聖鑒謹

奏 本月 日奉

旨著照所請該衙門知道欽此

郵報處各衙門往來文件照章納資片

宣統三年閏六月

再臣部接收郵政正在規定畫一章程以免各省自爲風氣查外洋郵政法規凡關於未交之郵費郵局得依國稅遲交處分之例徵收之又云關於郵政郵便儲金郵便匯兌電報電話事務之郵件得不收費可見外人注重郵政各費等於國稅有先取特權凡不屬於郵政者皆須收費臣等督飭洋員籌商辦法嗣後如逢廷寄以至

上用各項及

頒賞等物由郵報處往來者概行免費其餘各衙門均

有辦公經費自應仍照郵政向例納資庶於推行交通
政策兩無妨礙俟新章訂定以後再行奏明辦理謹附
片陳明伏乞

聖鑒訓示謹

奏 本月 日奉

旨著照所議辦理欽此

聲明湘路股款情形分別辦理摺

宣統三年七月
支部會奏

度

奏爲聲明湘路股款情形請分別辦理恭摺仰祈

聖鑒事恭讀本年五月二十一日

上諭度支部會奏遵旨籌畫川粵漢幹路收回詳細辦法各摺片鐵路收歸國有固以維持路政實以體恤民艱前經降旨停收川湘等省各項股捐並累次諭令將已收之款妥籌辦法茲據奏稱請將粵川湘鄂四省所抽所招之公司股票盡數驗明收回由度支部特出國有鐵路股票常年六釐給息嗣後如有餘利按股分給倘願抽本五年後亦可分十五年抽本未到期者並准

將此項股票向大清交通銀行照行規隨時抵抽其不願換國家鐵路股票者均准分別辦理以昭平允湘路商股照本發還其餘米捐租股等款准其發給國家保利股票籌畫尙屬妥協著督辦粵漢川漢鐵路大臣迅速前往會同各該省督撫遵照所擬辦法將所有收款分別查明細數實力奉行等因欽此仰見我

皇上洞知民隱俯卹商艱之至意欽佩莫名竊查度支部郵傳部督辦粵漢川漢鐵路大臣會奏籌畫川粵漢幹路收回詳細辦法摺內稱粵川湘鄂四省所抽所招之公司股票盡數驗明收回擬由度支部郵傳部特出

國家鐵路股票長年六釐支息如有餘利按股均分又稱或願領資本不願換領國家保利股票者必應分別辦理以昭平允湘路所收五百數十萬內有米捐鹽捐租股房股各項四百餘萬兩商股約一百萬左右擬定將實在商股一百萬兩照本發還其餘米捐鹽捐租股房股除美國贖約經費二百餘萬兩外准卽另發國家保利股票長年息六釐五年後分作十五年攤還以充本省實業公用等語查湖南本爲貧瘠省分歷年所籌路款爲數不過五百餘萬且合官民之力合作通籌僅及此數然其中款目繁多來源各異欲求安置妥貼必

須細與區分庶下以盡臣民維持路政之心上以符

朝廷體卹民艱之意謹就

臣

等見聞所及爲我

皇上一一陳之原奏於米鹽租房各股除去美國贖約
經費三百餘萬兩外始准發給股票不知贖約之款皆
係實銷與粵之虛糜不同尤與川之倒帳迥別本無可
扣之理且贖約一事本係國家之責而非地方之責湖
南米鹽房租商股各款皆因造路而籌非因贖約而籌
其用之贖約者厯年所積多至二百八十餘萬實皆造
路項下之墊款更非可以贖約名目扣除者且墊款中
米鹽房租商股皆有之不能強爲分別謂無商股在內

今乃因商股各有主名不便扣除但扣米鹽房租等款是又不知房租本與商股無殊亦各有股東之主名皆無扣除之法僅以米鹽併計其數不及三百萬必須加入房股租股方足三百萬兩之數是不僅公其之米鹽全扣并且侵入商民私家血本矣揆諸情理豈得謂平臣等以爲米鹽房租商股皆應一律請免扣除贖約俾昭平允此應聲明者一也原奏房股租股與米鹽並稱而不與商股並稱實則房租股與商股區別甚微不過一爲勸募而來一爲攤派而來而其各有主名之股東手持公司股票則一也強爲區分必生窒礙原奏稱分

年攤還以充本省實業公用實非房股租股性質所能辦到此應聲明者二也租房商股皆係箇人私股至於鹽斤加價乃以鐵道名義附加徵收實屬地方公款性質國家發給股票之後即可按年支息分紅以爲地方公益之用應請於私股之外別爲地方公股以示區別此應聲明者三也鹽斤加價之外又有米捐一項聞現在湖南地方官謂米捐非因路務而起此種股票應以歸官不得作爲地方公股不知米捐初因振糶而設卽係地方公共之事後因振務將畢路務已興遂將未停之米捐由紳商呈請地方官批准撥充造路經費是與

鹽斤加價性質略同不得謂非鐵路名義所籌之款當此國有實行人民疑懼之時地方官何可藉端爭持以壅

皇仁而滋羣議臣等以爲振糶米捐一項宜與鹽斤加價一例作爲地方公股俾得分息分紅藉以充本省備荒及地方公共實業之用此應聲明者四也此次國家借入外債特因各省股本不敷造路故籌鉅款以期速成旣准商民一律附股則國家並無排除民股之心已爲中外所共見惟湖南商股不過百五十萬此後商民如願繼續附股應請一體照收發給分紅分息股票旣

以紓國家之財政復以免人民之向隅似亦政體所宜此應聲明者五也以上五者皆事理之所當然輿論之所注重臣等熟權利弊既不願風潮推盪上貽

君父之憂復不欲議論尤多下有閭閻之擾爲此合詞陳請擬懇明降

諭旨將湖南路用鹽斤加價賑糶米捐各款皆准作爲地方公股房股租股皆准作爲私股一律給與分紅分息股票並准以後商民繼續附股以解糾紛而息羣議臣等爲通上下之情解官民之鬭起見所有聲明湘路股款情形請分別辦理緣由理合恭摺具陳伏乞

皇上聖鑒訓示謹

奏本月日奉

諭旨

議西潼鐵路收歸官辦摺

宣統三年八月度支部會奏

奏爲遵

旨議覆恭摺會陳仰祈

聖鑒事竊准內閣鈔交陝西巡撫奏西潼鐵路商辦尙無成效擬請改歸官辦一摺宣統三年七月初六日奉硃批該部議奏欽此欽遵到部原奏內稱西潼鐵路自光緒三十一年擬歸官辦三十三年變通辦法議由紳商合辦官爲主持迄今五年屢經催飭先後據稱招募股款八十餘萬並未開收本年五月四川招股分處議定開收亦無多日後效難期可否照准幹路章程收回

歸官辦理

敕下度支部郵傳部會籌指定收回辦法以重路政而
卹商艱等語查西潼鐵路近聯汴洛遠達甘新實爲東
西緯幹之樞紐光緒三十一年前陝西撫臣曹鴻勛奏
請籌款修築期與豫省之洛潼一氣呵成惟該省風氣
晚開商股無從招集奏辦數年迄未興作宣統元年臣
部奏准該路設立公司並於分年籌備要政案內奏明
限令自開辦之日起於三年內集股鳩工每年須有三
分之一報部查明始能准其接續籌築屆時倘不及半
即由臣部籌措鉅款代爲建造該路約長二百餘里估

計約需四百萬兩以上每年招股三分之一須有一百數十萬兩左右現在已逾二年僅報招股八十餘萬並未開收四川招股分處收股亦無成效按照原定奏案該路久在應行撤銷之列自應准其收歸官辦惟該路介居腹地目下與他路不相毗連必須全幹通籌乃能收一氣貫注之效伏查潼關以東已成之路雖有汴洛未成之路尙有洛潼洛潼一日不成則西潼之運料施工俱難著手而洛潼一段自光緒三十二年奏准商辦宣統元年又於分年籌備要政案內奏定招股鳩工期限應較西潼更早一年現在期限將屆迄無成效亦應

妥籌辦法擬由臣部先行派員勘估通盤核計一俟籌款定綫議有端倪再行奏明辦理度支部查西潼一綫銜接洛潼並西通甘新等處係屬西幹正軌關係交通至爲重要現郵傳部既經議准西潼收歸官辦洛潼亦擬勘估自應俟估有確數後遵照宣統元年奏案由郵傳部籌措鉅款會商臣部核明具奏再查光緒三十二年閒據前陝西撫臣曹鴻勛奏稱由西安至臨潼分爲第一段刻期修築所費不過數十萬金一面由庫司騰挪一面集股增益旋由臣部於議覆該撫加抽土釐案內行令將司庫騰挪動支何款並數目若干查明聲覆

等因在案此次奏稱籌給開辦經費六萬兩並由司續
籌保息等款其動支何款續籌數目均未聲敘應仍令
該撫詳細查明咨報臣部查核所有遵議西潼鐵路收
歸官辦緣由謹恭摺會陳伏乞

皇上聖鑒再此摺係郵傳部主稿會同度支部辦理合
併聲明謹

奏 本月 日奉

旨依議欽此

議覆滇省減收隨糧路股摺

宣統三年八月度支部會奏

奏爲遵

旨議奏恭摺仰祈

聖鑒事宣統三年五月初五日准內閣片交雲貴總督李經羲奏滇蜀騰越鐵路隨糧認股民力難支現擬酌量減收以紓民困一摺本日奉

硃批該部查核具奏欽此欽遵到部原奏內稱滇省籌修滇蜀騰越鐵路因工艱費鉅將隨糧認股章程議改爲每糧一石收銀五兩以一年爲限前經奏明遵辦在案計自開辦以來如數完納者寥寥無幾

臣詳加體察

禁煙之後貧民自養尙苦不給何能勝此負擔業經擬定變通糧股議案札該省諮議局覆議嗣據該局議決覆稱自宣統二年起一律實行減爲每糧一石隨收路股銀二兩至軍糧原係減半認股亦擬減爲每石收銀一兩官莊與永昌之七土司思茅之八猛臨安之十三板納新設之永康州等一律免收至鎮沅威遠鎮各廳民情異常貧苦應照新章完納四分之一每糧一石收銀五錢惟議案決覆已在十月中旬距宣統二年開徵之時已久應完路股或有隨糧已收者或僅完糧而未完股者應將糧股均未完納之戶卽照新章改納其已

完糧而未完股者則於三四兩年分各帶征銀一兩以清前欠若已照舊章完納則所餘三兩之數准流抵來年應完之股其有軍糧地方及鎮沅三廳所屬並照此類推辦理至宣統元年以前舊欠統俟十年期滿再行遞年補完等語查滇省自辦滇蜀騰越鐵路隨糧認股每糧一石收銀五兩原因路長工鉅故勉籌該款以爲挹注之資惟滇省僻在邊壤地瘠民貧厯年催征已不能如數完納近因禁種鶯粟生計尤艱該督所請自宣統二年起減爲每糧一石隨收股銀二兩軍糧減半收納官莊與永昌之七土司思茅之八猛臨安之十三板

納新設之永康州一律免收鎮沅威遠鎮邊各廳每糧一石收銀五錢各節自係爲體恤民艱起見應請

准予立案施行藉廣

皇仁而紓民困至徵收之法宣統二年未經交納之股應照新章三四兩年分別帶征其已照舊章完納者所餘三兩之數准抵來年應完之股在元年以前舊欠俟十年期滿再遞年補完各辦法亦屬切實可行應卽一併照准一面由該督將歷年已收股款造冊報部存查嗣後續收亦應按年造報以重款項所有議覆滇省減收隨糧路股緣由謹恭摺具陳伏乞

皇上聖鑒訓示再此摺係郵傳部主稿會同度支部辦理合併聲明謹

奏 本月 日奉

旨依議欽此

京張鐵路兼辦雞鳴山煤礦情形摺

宣統三年八月

奏爲京張鐵路兼辦雞鳴山煤礦謹將歷年辦理情形恭摺具陳仰祈

聖鑒事竊京張鐵路係由關內外鐵路局撥款興築光緒三十一年開據關內外鐵路局詳稱由京至張家口沿路各處煤礦甚多應由京張鐵路開採以免利權外溢擬請嗣後無論華洋官商稟請在沿路兩旁與附近地方擬辦礦務須先向京張局商詢願否自行開辦如鐵路不願開採始准該官商辦理等語經前督辦大臣袁世凱等據咨前商部准予立案旋由該局派員前往

直隸宣化府屬之雞鳴山一帶勘驗礦苗擬就雞鳴山八畝地收買舊峒另開新井先爲試辦所需經費卽由路工經費項下墊撥復經前督辦大臣批准照辦光緒三十四年冬閒該局詳稱據礦師勘報雞鳴山玉帶山八寶山山勢毗連煤質尙佳均爲鐵路經過附近之所必須聯絡一氣方能日久見功擬請劃歸官辦經臣部轉咨農工商部准給開礦執照三紙並以各該礦地係部飭由京張局兼辦自與商辦有殊應免交納地稅又所出之煤如係部轄各路官局取用應免繳煤筋出井稅先後咨明農工商部各在案隨將開礦工程及運煤

支路次第布置其附近小窰有礙新井者則商由地方
官給價收回封閉自上年起每日出煤約四五十噸惟
尙在浮面一層煤質未能盡合火車之用加以水火塌
陷在在隄防程功致難尅定今年春閒臣部派臨城礦
務局總辦鄺榮光兼充該礦礦師會同京張鐵路總辦
切實整頓據報近來發現煤綫二處頗爲深厚逐加化
驗灰少質佳今冬當可深透大槽日_出之煤以供該局
鐵路取用或可有盈無絀所有歷年動支經費行化銀
四十七萬餘兩擬請作爲該礦成本俟出煤暢旺分籌
拔本又玉帶八寶兩山實爲雞鳴山後來補助之要應

俟該礦辦有成效隨時妥籌擴充懇予奏明立案等情
查歐西各國凡欲創修鐵路靡不注意煤礦誠以煤爲
行軍所需路惟運輸是賴二者相輔而行方能歷久不
敝京張鐵路係完全官款自辦之路沿途礦苗豁露開
辦伊始卽經前商部立案准由該局儘先開採俾鐵路
旣無缺煤之患而礦產亦少覬覦之憂試辦以來歷有
年所近始略具規模雖非上等煤礦亦當有舉莫廢將
來倘能推廣礦區預籌銷路或可日有起色容由臣部
督率該路總辦礦師等認真籌畫設法保持以收礦路
相維之利至玉帶八寶兩山旣與雞鳴山相連且經農

工商部給照有案擬卽劃作該局官辦礦區留爲將來擴充地步庶足以垂久遠而給取求除將該礦歷年動支款項飭由京張路局另案造報再行核銷外所有京張鐵路兼辦雞鳴山煤礦緣由理合恭摺具陳伏乞

皇上聖鑒謹

奏 本月二十九日奉

旨知道了欽此

愚齋存稿

卷二十一

目錄

三

愚齋存稿卷第二十一